

A LA MIA NONA DALO (NATALE 1981)

Questi in ricordi che me pasa per la ment
chi poch volt che me capita de ves lì a fa nient
a me ricordi cume sel fudes inco
de la mia nona, la nona Dalo

che quant a gh'era ul tempural la gaveva paura
a sta de per lé
e a fach cumpagnia la me tirava semper adré
in del sut scala che num a ghe disezum ul pulé
perchè in da la cà a gh'era i tavul di cavale;

la me stringeva fort taca al scusà
che quasi quasi a me sentivi sufegà
e i Ave Maria crudaven maneman
cunt ul rusari che ghe tremava in di man.

A la dumenica quant la me dava la buna man
e l'era semper un des ghei de ram
a curivi subit a tò i buroi in de Sandrin
che al tigneva un po' scars ul misurin;

alura spetavi quant gh'era Teresa, la sua mié
che ne dava via semper un po' pusé;
mi andavi amò al asilu quindi a seri piscinin
e cugnusevi no namò ul valur di dané

ma vedevi che cunt un nichelin
di castegn a me ne daven pusé
e cun la mia nona a seri semper insistent
perché vurevi anca mi un suldin d'argent,

ma anca se insistevi a gh'era nient de fa
perché ghe n'era tanti di neut da cuntentà
e a chi temp là (a parli de prima de la guera)
se viveva apena cunt i frut de la tera.

Ul lach gh'era curda ai uperari lì visin,
la vendeva un quei ov, ogni tant un para de gain,
per Natal vegniva prunt un quei capun
che al scusava de 200 ur e de pensiun.

La vita l'era dura epur eran cuntent
ga pensavan minga a lamentas
perché tuc gavevan poch o nient
e quindi gh'eran nisugn de cunfruntas;

ades che se sta bin a l'é puse difcil a sta al munt
perché cui alter fem semper ul cunfrunt
ma se duvesum cunfruntas cun tanta pora gent
a duvarium diventà menu esigent.

Imparem dai noster vec la semplicità
e la vita un po' pusé serena la sarà
cume la faseva la mia nona Dalo
che me la ricordi cume sel fudes inco.

Michele Mauri